

Publicaziuns officialas dils 6 da december 2024

Vischnaunca Trun

Rapport dalla radunonza da vischnaunca dils 02-12-2024

Tractanda 1 Avertura ed elecziun da 2 dumbravuschs

Sco dumbravuschs vegnan Alexa Decurtins ed Erich Decurtins elegi.

Tractanda 2 Approbaziun dil protocol dalla radunonza communal dils 04-12-2023

Il president communal Dumeni Tomaschett declara ch'il protocol seigi staus a disposiziun tier l'administraziun communal per investa. Cunquei che negin giavischa la prelecziun dil protocol sa vegnir passau tier la votaziun d'approbaziun.

Il protocol dalla radunonza communal dils 04-12-2023 vegn approbaus en votaziun unanima cun engraziament.

Tractanda 3 Informaziun davart la situaziun dil Campadi Ogn

Igl october 2013 han votantas e vontants da Trun decidu cun gronda maiortad da baghegiar in niev campadi e fundar la Campadi Trun SA. Igl ei vegniu concediu in credit da frs. 2'090'000 e decidu che la vischnaunca sustegn il campadi cun surpender bien frs. 900'000 dall'amortisaziun da tal. Suenter la fasa da baghegiar ha l'entira nova infrastruttura saviu vegnir prida en funcziun entras la Campadi Trun SA il fenadur 2016.

Il menaschi ei sesviluppau a moda plascheivla e la sviulta ha saviu vegnir augmentada dad onn per onn, tochen sin igl onn 2023, nua ch'ei ha dau ina sperdita extraordinaria.

El decuors dils onns han ins stuiu constatar, ch'il cashflow dil menaschi ei memia bass per purtar las amortisaziuns necessarias. Tenor plan da business ei previu che la Campadi Trun SA ha da separticipar mintga onn successivamein cun ina pli gronda cumpart vid l'amortisaziun dil credit dalla vischnaunca, e la finala da surpender l'entira amortisaziun naven digl onn 2027. Era cun optimar il menaschi sin la megliera moda pusseivla vegn il cashflow buca a tonscher per far las amortisaziuns e las remessas necessarias.

La primavera 2024, suenter ver retschert il quen final 2023, ha la Campadi Trun SA incaricau il biro fiduziari ADDISSA d'anflar sligiazions pigl avegnir dil Campadi Ogn. Il biro ha elavurau differentas opziuns ed ei vegnius tier la conclusiun che la suletta schanza pil survivor dil campadi ei da discargar la Campadi Trun SA dil buordi financial dallas immobilias. La vischnaunca vegn dumandada da surpender las immobilias dil campadi cun ils deivets existents. La suprastanza communal ha decidu da suttametter la faschenta ils 6 da schaner 2025 al cussegl da vischnaunca e suenter ils 9 da fevrer 2025 alla cuminonza dils votants.

Tractanda 4 Preventiv per igl onn 2025

Il president communal informescha ch'il cussegl da vischnaunca hagi tractau il preventiv 2025 e proponi unanimamein l'approbaziun da tal.

Il preventiv dil quen da gudogn e sperdita 2025 siara cun in surpli d'entradas da frs. 185'300.–. Il gudogn avon amortisaziuns munta à frs. 777'900.–. Il quen d'investiziuns preveda investiziuns nettas da frs. 1'990'000.–.

Las posiziuns principalas dil preventiv d'investiziuns secumponan ord:

2170.5140.00	Plazza da semover sin plaz scola	Frs. 200'000.–
3500.5030.00	Sanaziun plaz e mir Nossadunna	Frs. 120'000.–
6150.5010.07	Sanaziun via Darvella – Gassa sut	Frs. 750'000.–
6150.5030.02	Parcadis communalas	Frs. 160'000.–
7101.5031.01	Sanaziun aquaduct Schlans	Frs. 260'000.–
7201.5032.00	Sanaziun canalisaziun communal (Via Darvella – Gassa sut)	Frs. 250'000.–
7301.5030.00	Plazza per rimnada da rumians	Frs. 650'000.–
8201.5030.00	Butschin d'aua per uaul da schurmetg Munt	Frs. 450'000.–
8714.5214.00	Ovra hidraulica Furschaniz	Frs. 100'000.–

Suenter quell'explicaziun surdat il president il plaid alla canzlista communal per informaziuns detagliadas davart il preventiv 2025. Sandra Gautschi presenta las diversas spartas dil preventiv cun dar las explicaziuns necessarias.

Ils presents approbeschan en votaziun unanima il preventiv dil quen da gudogn e sperdita ed il preventiv dil quen d'investiziun pigl onn 2025.

Tractanda 5 Fixaziun dil pei da taglia pigl onn 2025

Il president communal informescha che la suprastanza communal, la cumissiun da gestiun ed il cussegl da vischnaunca proponien alla radunanza communal da schar il pei da taglia per igl onn 2025 sin 95% dalla taglia cantunala semplia.

Ils presents fixeschan en votaziun unanima il pei da taglia per igl onn 2025 sin 95% dalla taglia cantunala semplia.

Tractanda 6 Decisiun da separticipar alla Corporaziun dallas vischnauncas concessionarias dallas Ovras Electricas Reinanteriur SA ed approbaziun dils statuts

Il dretg dallas auas ha ellas vischnauncas dalla Cadi ina liunga tradiziun. Ils 7 da fenadur 1956 han las vischnauncas dalla Cadi ensemen cul cantun Grischun e la Nordostschweizerische Kraftwerke AG (NOK) fundau las Ovras electricas Reinanteriur SA (ORA) cun sedia a Mustér. Igl intent dall'ORA era lu ed ei aunc adina dad utilisar la forza hidraulica dil Rein Anteriur e da ses flums laterals. Cull'approbaziun entras il Cussegl pign (Regenza) dil cantun Grischun, ils 29 da december 1959, ein ils contracts dallas concessiuns denter las vischnauncas dalla Cadi e l'ORA pil dretg d'utilisaziun dallas auas dallas vischnauncas concessionarias entrai en vigur.

Las concessiuns han in cuoz d'80 onns che ha entschiet il mument che l'ORA ha priu en funcziun las maschinas igl 1. d'october 1968 e finescha ils 30 da settember 2048. Oz ein biebein 2/3 dil temps da concessiun spirai. Duront quei temps ha l'ORA utilisau cun success las forzas dall'aua dallas vischnauncas. Las vischnauncas han saviu profitar da tscheins d'aua sco era dallas dividendas annualas dall'ORA. Sper quell'entradas han las vischnauncas saviu profitar dalla vendita dall'energia da participaziun e da concessiun. Quell'entradas ein stadas d'immens grond'impurtonza pil svilup da nossas vischnauncas muntagnardas.

Suandontas sfidas spetgan las vischnauncas entochen il termin dalla scadenza dallas concessiuns ils 30 da settember 2048:

- 2033: Tenor la legislaziun pil dretg dallas auas cantunal sco era federal han ils concessiunaris d'annunziar 15 onns avon la scadenza dalla concessiun allas vischnauncas concessiunarias, schebein els giavischan da prolungir la concessiun dil dretg dallas auas ni buc.
- 2038: Entochen sil pli tard 10 onns avon la scadenza dallas concessiuns decida mintga vischnaunca sur dalla prolungaziun da sia concessiun ni sur dil retuorn a tschep.
- 2038-48: Las vischnauncas ed il cantun contraheschan cull'ORA pertuccont la prolungaziun dalla concessiun ni sur dil retuorn a tschep. La decisiun finala vegn prida da mintga vischnaunca. Il cantun sto surprendre la decisiun dallas vischnauncas

Sin las vischnauncas concessiunarias spetgan pia grondas sfidas concernent las differentas damondas davart las concessiuns actualas cun l'ORA, la participaziun al cussegl d'administraziun dall'ORA, l'economisaziun dall'energia dallas vischnauncas ed en special il retuorn a tschep e las concessiuns futuras dil dretg dallas auas. Ils megliers resultats per nossas vischnauncas savein contonscher mo sche nus essan units enviars nos partenaris. Ussa han las vischnauncas aunc il temps da sepreparar sin quellas sfidas cun baghegiar si las cumpetenzas necessarias per la finala contonscher il meglier resultat pusseivel. Cun fundar ina corporaziun da vischnauncas han las vischnauncas concessiunarias ina megliera pusseivladad d'influenzar comunablamein e pli sistematicamein las decisiuns che ston vegnir pridas el decuors dils proxims onns che sche mintga vischnaunca contrahescha individualmein e persula. La corporaziun coordinescha e representa ils interess e giavischs comunabels ed era quels particulars dallas vischnauncas concessiunarias enviars la concessiunaria e visavi tiarzas personas. Denter auter prepara ella per mauns dallas vischnauncas concessiunarias la basa per decider e las informaziuns en connex cun las damondas suramenziunadas.

La radunonza communal decida cun 45 : 0 vuschs da separticipar alla Corporaziun dallas vischnauncas concessiunarias dallas Ovras Electricas Reinanteriur SA e d'approbar ils statuts dalla nova corporaziun.

Tractanda 7 Varia

Sut varia informescha il president communal davart entginas actualitads.

Per la suprastanza communal

Il president: Dumeni Tomaschett

La actuara: Sandra Gautschi

Pignola da Nadal

Il pigniel da Nadal sa vegnir empustaus tier il selvicultur da revier entochen ils 13 da december (tel. 081 920 20 46 ni 078 729 73 84). La pignola da Nadal vegn repartida venderdis, ils 20 da december naven dallas 8.00 – 12.00 en luvratori.

Prezis:

pégn tenor lunghezia frs. 19.– / 22.– / 27.– / 30.–

viez «Weisstanne» tenor lunghezia frs. 35.– / 45.–

pégn da Nordmann tenor lunghezia e qualidad frs. 35.– / 50.– / 75.–

Sin damonda vegnan ils pigneuls era furni a casa (+ frs. 5.–).

Scumandau ei da tagliar sez il pigniel; en uauls da schurmetg, en uauls da produczion da lenna, sin schischom privat senza lubientscha dil proprietari.

Pignola che crescha sin alps e pastiras, agl ur dil Rein, dalla Ferrera e dalla Zavragia astga vegnir tagliada libramein.

Uffeci forestal Trun

Uniun da dunnas Trun/Zignau

Suentermiezdi da zambergiar schenghetgs per Nadal cun stiva da caffè, mesjamna, ils 11 da december allas 13.30 – 17.00 en l'aula a Trun.

Affons pigns e gronds ein cordialmein envidai a nies suentermiezdi da zambergiar schenghetgs da Nadal per vos cars. Da cuminonza saveis vus crear, decorar ni colurar ina sorpresa per tat e tatta, bab e mumma, padrin, madretscha ...

Informaziuns impurtontas:

- affons tochen 10 onns vegnan en accumpignament d'ina persuna carschida
- la segirada e la resposablada ei caussa da mintga participont
- ina annunzia ei buca necessaria
- ils schenghetgs cuostan
- igl ei pusseivel da pagar bar ni per TWINT

Nus selegrein fetg sin vossa viseta ed in emperneivel suentermiezdi creativ!

*Andrina, Laura, Annatina e Jolanda
cun Uniun da dunnas Trun/Zignau*

Suentermiezdi creativ

Temps d'esser creativs en cumpignia! Nus s'entupein mesjamna, ils 11 da december 2024 allas 14.00 ella scola Trun cun nos projects, giugs ni gust da star ensemen. Tgi che sa buc organiser senza in taxi, sa s'annunziar tochen dus dis avon tier Manuela Schwarz (077 406 21 08)

L'Uniun da dunnas envida cordialmein e selegra sche Ti eis era dalla partida!